

Guangjisi Minzcuz Bau

ganbhau: CN45-0036 B.2013 Nd.1 Ng.9 liggaueq nyaemzaenz nienz ndwenit ngeihbet

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3056期

Lungzswng: Aeu Cosih Mizyauq Henhoh Nem Swnjcienz Vwnzva Minzcuz Conzdungj

龙胜:以有效措施保护与传承传统文化

Gaenh bi daeuj, Lungzswng Gak Cuz Swciyen aeu buek cosih mizyauq he daeuj gyagiengz ligdoh henhoh nem swnjcienz vwnzva minzcuz conzdungj.

It dwg genhciz ginzung vwnzva lusen. Dangqnaj, aen yienh neix gaenq miz 196 aen yezyiz vwnzyidui, ginzung yenjyenz 4600 vunz. Gij cezmuzy gyoengqde yienj haenx dingzlai dwg nungzminz gag bien gag yienj, neiyungz nem hingzsiq cungj yienh'ok gij daegsaek nem cingsaenz vwnzva minzcuz dangdieg.

Ngeih dwg cizgiz cihciz mbanj gaeuq mbanj mizmingz lai fuengmienh gawjbanh cietgingq hozdung, diuhdoengh vunzlai, hawj gyoengqde miz yisiz henhoh nem swnjcienz vwnzva minzcuz. Dangqnaj, aen yienh

neix cingq haenqrengz dajcaux "aen yienh bak ciet minzcuz", aeu neix daeuj cauhaenz gij fwnveiz "ciet hung sam loeg gouj, ciet iq ndwendwen miz", doidoengh minzcuz vwnzva lijyouz canjyez fazcanj nem minzcuz doxgiet cinbu.

Sam dwg daihlig fazcanj mbanj minzcuz lijyouz, dawz foux nem go minzcuz daengj vwnzva minzcuz bienq guh diemj hawj ginghci demhwnj. Dangqnaj, aen yienh neix miz mbanj Yauzcuz Sanhmwnz, mbanj Bouxcuengh Lijbaiz, mbanj byoem raez Vangzloz daengj mbanj minzcuz lijyouz, moix mbanj cungj miz go foux minzcuz byaujyenz. Gij byaujyenz neix hawj vunzlai daezsang yisiz gag henhoh vwnzva minzcuz.

Seiq dwg cizgiz diucaz nem

henhoh feihvuzciz vwnzva yizcanj. Gaenh bi daeuj, aen yienh neix vwnzvagiz diucaz le daengx yienh feihvuzciz vwnzva yizcanj, gungh sou ndaej soqgawq 1000 lai hangh, caemhcai doenggvaq gak cungj fuengsik gyagiengz henhoh feihvuzciz vwnzva yizcanj; ndawde gaenq miz 6 hangh ndaej lied guh swcigih gaep, 21 hangh ndaej lied guh si gaep feihvuzciz vwnzva yizcanj.

Haj dwg gyagiengz yenzgiu nem cingileix vwnzva minzcuz, coicaenh song aen vwnzmingz gensez. Gaenh bi daeuj, aen yienh neix cizgiz haenqrengz guh hong yenzgiu, cingileix nem henhoh vwnzva minzcuz, caemhcai aeundaej cwnzgjoj hungloet.

(Lungz Cwng)

SIUSIK DINJ

简讯

● 1 nyied 6 hauh, gicej daij Lozcwngz Mulaujcuzy Swciyen Sevei Gohyoz Gai Lenzhozvei ndaej siusik, bonj 《Lizsij Mulaujcuzy》 ndaej Gvangjsih daih' cibngeih baez sevei gohyoz youhsu cwnzgjoj itdaengjciengj, dwg Hozciz Si bonj saw gag ndaej yiengh ciengj neix.

(Se Danh Cwngh Yijbingz)

● Bi' gvaq, Gunghcwngz Yauzcuz Swciyen daengx bi youq 83 aen mbanj guhsat roensuijniz, roengzngaenz 871.25 fanh maenz, roensuijniz gungh raez 54.94 goengleix. Neix hawj 5411 hoh 2086 boux ginzung ndaej byaij roensuijniz lo.

(Gyangh Dauh)

● Daj 2008 nienz daeuj, Hocouh Si Bingzgvei Gvanlijgih Minzcunghgiz cizgiz bang doenghboux hagseng saujsu minzcuz, hawj gyoengqde ndaej onjsim doegsaw, ciuq gyoeksuenq, gungh miz 25 boux hagseng saujsu minzcuz maenhndei ndaw ranz gungzhoh haenx ndaej bangcoengh, saedyienh le aen muzbyauh "mbouj hawj saek boux hagseng aenvih ranz hoj couh saethag".

(Vangz Ligenh)

● Vihliux hawj ranzvujbauj bouxgeq "miz ranz youq", bi' gvaq, Denhdwngj Yenveij Cwngfuj roengz 300 fanh maenz hawj 100 hoh ranzvujbauj bouxgeq hwnj ranzmoq. Dangqnaj, gaenq guhsat ranzmoq lo.

(Vuh Cincungh Vangz Lilanz)

● Bi' gvaq 12 nyied co, Nanzningz Si Hinghningz Gih Hinghningz Segih "ranz minzcuz" cujciz saujsu minzcuz ginzung gaihcanj ranz minzcuz doxlien z hozdung, gyoengqvunz ndaw gih neix nem saujsu minzcuz liuzdung doengzcae ciengqgo, diuqfoux, bengcag, dwk gibaizgiuz, gij vunzlai hozdung neix hawj engqgya doxndei.

(Hanz Minj)

Hocouh Si Bazbu Gih Gawjbanh Minzcuz Doxgiet Cihsis Doxdax Hozdung



贺州市八步区举行民族团结知识竞赛活动

Geij ngoenz gonq, Hocouh Si Bazbu Gih gawjbanh le ndaw gih daih' it baez minzcuz doxgiet cihsis doxdax hozdung. Hogaih Cin Sanghlenz Cunghyoz, Budouz Cin Budouz Cunghyoz, Vangzdung Yangh Minzcuz Cunghyoz, Hocouh Minzcuz Lijyouz Yisuz Cizey Zozyau 4 aen daihyaujdui neix baij senjsouj camgya doxdax. Gij neiyungz doxdax baugvat minzcuz cwngcwz, minzcuz funghcingz nem minzcuz funghsuz dangdieg daengj. Ginggvaq doxdax, Hocouh Minzcuz Lijyouz Yisuz Cizey Zozyau daihyaujdui ndaej itdaengjciengj. Ndaw doz dwg doxdax yienhciegz.

(Cau Fuzdungh)

Denhdwngj: Hong Sanhnungz Laebdaeb Ok Diemjrongh

天等: 三农工作亮点频现

Bi' gvaq, Denhdwngj Yen gig yawjnaek hong sanhnungz, ok cwngcwz, comz cienzngaenz, ca daegsaek, hawj hong sanhnungz laebdaeb ok diemjrongh, mizyauq coicaenh ginghci lajmbanj ndaej laebdaeb fazcanj. Bi' gvaq buenq bi gonq, aen yienh neix nungz linz muz yiz canjyez cungjcanjiz miz 5.36 ik maenz, doengzbeij demhwnj 6.9%, gij suzdu demhwnj haenx baiz youq daengx si daihsam.

Bi' gvaq, aen yienh neix lozsiz gak hangh cwngcwz hawj nungzminz giengz hawj nungzminz fouqmiz, vih vunzlai banh saehsaed saehndei.

Dangqnaj, daengx yienh gaenq fatcuengq gak hangh boujdiep 6160.25 fanh maenz.

Daegsaek canjyez mboujduenh fazcanj. Bi' gvaq buenq bi gonq, aen yienh neix dingh le buek youhvei cwngcwz he, doiq nungzhoh dajndaem boujdiep cawx ceh(miuz) nem vafeiz. Oij, makit bi giet song baez, manhdaengjmbwn daengj dajndaem menciz demgya gig lai. Makit bi giet song baez haenx dajndaem menciz dabdaengz 2737 moux, nungzhoh dajndaem moix bi souhaeuj cinghseuq miz 2 fanh maenz doxhwnj; manhdaengjmbwn dajndaem menciz

dabdaengz 6.5 fanh moux, daengx yienh 13 aen yangh(cin) cungj fazcanj rangh sifan dan ndaem 50 moux doxhwnj haenx, guj lwgmanh moq cungjcanjlieng miz 3.25 fanh dun, canjiz mauhgvaq ik maenz.

Cizgiz fazcanj dangzoiq canjyez. Bi' gvaq buenq bi gonq, daengx yienh ndaem oij menciz dabdaengz 9.5 fanh moux, saedyienh fazcanj moq, ndawde lai ndaem menciz beij bi' gyai demlai 2.1 fanh moux, baiz youq daengx si daih' it; doengzseiz saedyienh dieg oij gauhyau dwkraemx menciz dabdaengz 1.012 fanh moux.

(Vangz Lilanz)